

Jedno od pitanja o kojem bi se današnji muslimanski hermenutičari i pravnici islamskog prava trebali glasno izjasniti, ili ozbiljnije pozabaviti svakako je pitanje *zimmi-sistema* unutar islamske pravne nauke te pitanje razumijevanja tog pojma u kontekstu modernih pluralističkih državnih konstrukta. Pored ostalih pitanja vezanih za interpretaciju islama u savremenom dobu, Khaled Abou El-Fadl tematizira i ovaj problem u svojoj knjizi *The Great Theft: Wrestling Islam from the Extremists*. U ovom broju našim čitateljima predstavljamo poglavlje te knjige pod nazivom *Interakcija sa nemuslimanima i spasenje* u prijevodu Haruna Karčića. SAGLEDAVANJA sadrže tri teksta vrijedna pažnje obzirom na narastajuće antimuslimansko raspoloženje unutar nemuslimanskih zajednica širom svijeta. O tome kako i na koji način islam živi u Evropi, te kakva je muslimanska tradicija unutar tog geo-političkog prostora i na čemu se ona zasniva piše Jørgen S. Nielsen, u tekstu *Islam u Evropi: utvrđivanje i obnova*; u ovoj rubrici nalazi se i tekst Thomas Hylland Eriksena pod nazivom *Sloboda izražavanja i globalizacija: sukob oko karikatura i vrijednosti kosmopolitike*; a o glavnim temama poezije Muhammeda Ikbala donosimo poglavlje iz knjige *Ikbala* autora Mustansir Mira.

Redakcija časopisa *Novi Muallim* tekstovima u rubrici MUALLIM nastoji pratiti aktuelnosti iz oblasti odgoja i obrazovanja, koji bi trebali biti od pomoći našim čitateljima aktivno uključenim u proces nastave, te tako u ovom broju predstavlja tekstove: *Pojmovi edeb i terbijet u definiranju islamskog odgoja i obrazovanja*; *Značaj i uloga škole u prevenciji zloupotrebe droga*; *Pismena priprema za realizaciju nastavnog sata - Oslobođenje Mekke i Propisi posta*.

U organizaciji Udruženja ilmije Islamske zajednice u BiH i Fakulteta islamskih nauka u Sarajevu 3. juna 2008. održan je jednodnevni obrazovno-naučni seminar pod nazivom "Ekološka dimenzija imamskog poziva u bosanskohercegovačkim društvenim uvjetima i evropskom kontekstu". U rubrici TEMA BROJA , koja je posvećena ekologiji, predstavljamo tekstove predavača sa pomenutog seminara: dr. Enes Karić: *Ekološke poruke Kur'ana*; dr. Samir Beglerović: *Savremeno muslimansko mišljenje pred izazovima ekološke krize*; dr. Dževad Hodžić: *Priroda u znanstveno-tehnološkoj paradigmi*; dr. Dževad Jarebica: *Genetski modificirana hrana (GMO)*; dr. Hazim Hrvatović: *Vodni resursi Bosne i Hercegovine* i Vehid Arnaut: *Ekološka aktivnost imama u džematu*.

Za rubriku HISTORIJA OBRAZOVANJA uz ovaj broj pišu Amira Trnka-Uzunović i Kemal Bašić, a za rubriku MUALLIMOV ESEJ Samedin Kadić i Rifet Šahinović.

U ovom broju *razgovaramo* na temu koja pred naše čitatelje postavlja *živi i*, nadamo se, konstruktivan dijalog unutar IZ-e. Tema našeg foruma bila je RADIO BIR. Naime, pitanje medija i ovog radija postavljeno je da bi preispitalo naš odnos prema tome.

Čini se, kako se prema radiju BIR odnosimo na isti način, na koji se odnosimo i prema drugim projektima naše IZ-e. O kakvom je odnosu riječ? Neizinteresiranost, površnost i nedosljednost. Ali, daleko najpogubniji je odnos koji reflektira princip "mahale". Komentiramo programske sadržaje, glavnog urednika, voditelje, učače Kur'ana... od onoga što uopće pratimo na radiju, najvažnije su nam dionice u kojima su se desile greške. Komentiramo iz pozicije koja je nasličnija

likovima iz *Muppet showa*, *Statleru* i *Waldorfu*. Nema potrebe pojašnjavati šta je uloga ove dvojice u pomenutom *showu*, ali njihova strateška pozicija na balkonu neodoljivo podsjeća na nas. Nisu komentari svih nas jednako zajedljivi, a s druge strane ni jednako dobronamjerni, no obje te inačice naših kuloarskih komentara nemaju onu konstruktivnu kritičku nit koja jeste potrebna. Pored komentara, koji jesu neophodni da bi se naš radio unapređivao, potrebniji je naš angažman. Koliko smo mi u tome površni, neka nam kaže angažman svakog od nas, *balkon-kritičara*, na tom našem radiju. Iako ćemo ustvrditi, ukoliko uspije u medijskom prostoru, kako smo i mi barem djelomično zaslužni za taj uspjeh, do tada sve napore da taj radio uspije rado ostavljamo uposlenicima Radija BIR. A oni jesu mladi, i često neiskusni – da nisu, pitanje je da li bi se uopće prihvatili posla kojim se bave u ovim uslovima – ali, prije nego im to predstavimo kao mahanu, mogli bismo to vidjeti kao njihovu prednost. Da bi postali vrhunski stručnjaci u svom poslu, a ja vjerujem da na tom putu već jesu odmakli, nije im dovoljno obezbjediti miksete i kancelarije. Doobrazovanje je potrebno svakog struci, a u njihovom slučaju to bi upravo trebao biti prioritet, je jer je njihov rad svakodnevno na meti cjelokupne javnosti. Usudujem se reći da oni u javnosti BiH predstavljaju IZ-u, pristajali mi na to ili ne, sviđalo se to nama ili ne. To je jednostavno tako, a ako jeste tako, zašto im Zajednica koja jeste osnivač radija nije obezbijedila punu potporu za rad? Radio BIR nema dovoljno kadra, ali ono što ima vrijedno radi u uslovima koje im je obezbjedila Zajednica, a koje su predstavili učesnici ovoga foruma. Dakle, u krajnjoj liniji, za neuspjeh koji je moguć, naravno, može se i treba prozivati redakcija Radija, ali samo ukoliko im je bilo obezbijedeno ono što evidentno nije, a to je puna materijalna podrška. Tu ponovo na vidjelo izlazi naš odnos prema radiju, ali ovoga puta, naš odnos onda kada možemo da odlučujemo. Možda bismo i mi jednako tretirali ovaj projekt da smo u poziciji da odlučujemo o potpori koja mu je potrebna, jer na svim deredžama odnos je uglavnom isti. Samo neki odlučuju o finansijama, a neki *mahalanjem* o njegovom imidžu. Sve bi bilo drugačije da smo mi svjesniji da ovaj radio ima velike mogućnosti i da dnevno više muslimana sluša njegov program, negoli vazove u makar 100 džamija u BiH. Kada bi radio dobio potporu kakvu zaslužuje od svih nas, naša bi snaga rasla zajedno s njim. Radio IZ-e zamišljen je vrlo ambiciozno, ali te ambicije nisu bez pokrića. Da li ga takvog uspješnog želimo vidjeti govori naš odnos prema cijelom tom projektu. U zajednici muslimana u BiH postoje ljudi koji imaju bolji odnos prema našem radiju ali ih je malo, ne čuju se i ne odlučuju. Šta o ovom projektu imaju reći dr. Dževad Hodžić, Remzija Pitić, Zehra Alispahić, dr. Fahira Fejzić-Čengić, Mirsad Tukić, Hasan Eminović možete čitati u rubrici MUALLIMOV FORUM. Uz ovaj forum donosimo i tekst Mustafe Spahića, koji je i reagiranje na forum *O kadrovskoj politici i obrazovnom sistemu u Islamskoj zajednici* iz prošlog broja.

MUALLIMOVA HUTBA predstavlja dvije nove hutbe uz recenzije Ferid ef. Dautovića i Sulejman ef. Čelikovića, a PREGLED predstavlja nove naslove koje preporučujemo našim čitateljima.

Senada TAHIROVIĆ